



Шочмо эл, порылык да чын верч!

Б У Д Ъ Г О Т О В /

39-ше (3739) №,
2025 ий 3 октябрь,
кугарня



Ямде лий

1933 ий 1 февраль годсек лектеш.

5-октябрь –
Туныктышын кечыже.



Туныктышо – эн лишыл йолташ

Туныктышо йочалан кумда шинчымаш тўняш омсам почеш. Шотлаш, возаш да лудаш веле огыл, а сай ден осалым ойыраш, пўртўсым йўраташ, кугуракым пагалаш да изиракым чаманаш туныкта. Кажне туныктышын лўмжым историеш шўртнўй буква дене возен кодыман. Нуно эн кўлешан, пайдале сомылым шуктат, кажне снлан илиш корныш шогалаш полшат.

Марий Турек район Карлыган кыдалаш школышто 3-шо классыште шинчымашым погышо икшыве-влак шке туныктышыштым, Розалия Евгеньевна

Гавриловам (снимкыште), ўшанле энэртиш, поро йолташ да кокымшо ава семын ужыт.

– Ты професий деке изиэм годымак шўманьнам. Икымше туныктышем, Светлана Александровна Ермаковам, кугешнен онченам. Тудын гаяк тале педагог лияш шоненам, – ойла самырык туныктышо.

Самырык-влакым туныктымо пашаште кызыт шуэн вашлят. Розалия Гаврилова икымше ошкылым ыштыме деч ондак сайжым-удажым вискален, нелылыкым сенген кертмыжым шижын. Йўра-

тыме сомылжым кокымшо ий шукта.

– Йоча-влак койыш-шоктыш могырымат, тазалык, уш-акыл писылык денат тўрлў улыт. Тидым ончылгоч умылыман. Пашаште йодыш лектеш гын, кугу опытан туныктышо деч ой-канашым йодаш ўрман огыл, – ойла Розалия Евгеньевна.

Шергакан туныктышо-влак, профессионал пайремда дене шокышын саламлена. Пиалым, пашаштыда кугу лектышым да сай тунемие-шамычым тыланена.

Оля МАЙКОВА.
Фотом школ архив гыч налме.

ПОДПИСКЕ

11 октябрь марте Российыште Подписчикын декадыже эртаралтеш. 2026 ийын икымше пелийжылан «Ямде лий» газетлан шулдырак ак – 439 тенгеат 68 ыр (Марий Элыште) – дене возалтса. Индекс – П4696. Подписчик-влак коклаште лотерей модыш лиеш.

Рекламе.

Паша лектыш куандарыше

Марий Эл Республикысе наставник-влакын II форумышт Йошкар-Олаште эртаралтын. Тушко кажне район гыч эн чолга туныктышо-шамыч погыненыт. Морко район гыч 20 наре наставник лийын. «Движение Первых» толкынын паша лектышыжым иктешленят. Толкынын вуйлатымыж почеш тунемме ий мучко түрлө мероприятийым эртарена. Мемнан Шүргыял школнат «Марий Эл – территория заботы и заботливых людей» проект почеш пашам ышта. Форумышто I степенян диплом да шергакан пӧлек дене палемденят. Тидыже мемнам, тунемше-влакым, моткоч чот куандарен да ончыкыжымат сомылнам кыртмен ышташ



кумыланген. Мемнан наставникна – Елена Валериановна Григорьева (снимкыште). Тудлан таум ойлена да Туныктышын кечыж дене саламлена!

*Диана СКВОРЦОВА.
Морко район.*

Фотом школ архив гыч налме.

Чевер кече гай

Мыйын икымше туныктышем – Дарья Александровна Кочергина. Тудо самырык, мотор да моткоч поро кумылан. Ме икте-весе деке пеш вашке тунем шуынна. Классыш шыргыжын пурымыжо чевер кечым ушештара. Дарья Александровна лудаш, возаш, шот-

лаш туныктен. Кажне темым раш умылтара, йодыш лекме годым эре вашешта, ой-кагашым пуа. Туныктышем моткоч пагалем. Пашаштыже сай лектышым тыланем да пайрем дене шокшын саламлем!

*Мария МАМАЕВА.
Йошкар-Ола, 23-шо номеран школ.*

«Лүдыкшыдымӧ орава»



Ме велосипед дене кудалышташ йӧратена, но корнышто пеш түткӧ лийман. Тидым шотыш на-

лын, школышто «Лүдыкшыдымӧ орава» конкурсым кажне ийын эртарена. 5-7-ше класслаште тунемше-шамыч «Восьмёрка», «Змейка», «Квадратик», «Мостик» да моло этапыште мастарлыкштым тергенят. Иктешлымек пале лийын: Анжела Петрова ден Егор Васильев икымше верым сенен налыныт.

Тыгай мероприятийышке ушнен, ме шинчымашнам пенгыдемдена, корнышто кудалыштим правил-шамычым ушештарена. А те, йоча-влак, школыштыда тыгай конкурсым эртареда?

*Кира ДАНИЛОВА,
Полина ВАСИЛЬЕВА.
Волжский, Пӧтъял школ пеленысе
Йоча усталык школ.
В.А.Ямдашевтан фотожо.
Снимкыште: тагасымаш годым.*

Российысе увер

«Движение Первых» толкын дене пырля эртарыме мероприятий-шамыч нерген «ВКонтакте» воткылыш постым верандыза да МедиаЗачётка проектыш ушныза. #МедиаЗачет, #МедиаПритяжение хештег-влакым кучылтса. Эн чолга 100 возышлан пӧлекым кучыктат.

7-28 октябрыште финанс грамотность дене всероссийский онлайн-зачёт эртаралтеш. Тушко шкетын але еш дене ушныман. 7-11-ше класслаште тунемше-влаклан 15-17 октябрыште олимпиадный зачёт лиеш. Тұрыс увер – finzachet.ru сайтыште.

Калыкын икоян улмо кече вашеш школлаште 15 ноябрь марте «Я – россиянин» всероссийский йоча акций эртаралтеш. Тунемше-шамыч цифровой урокышто Российысе түрлө калыкын тұвыраж дене палыме лийыт.

Марий Элысе увер

15 ноябрыште «Ший памаш. Йоча-влак» республиканский фестиваль-конкурс эртаралтеш. Марий эстраде мурым мурышо 6-15 ияш ұдыр-рвезе-шамыч шкет але ансамбль дене ушнен кертят. Йодмашым 6 октябрь марте пуыман.

С.Г.Чавайн лүмеш Калыкле книгагудышто «Книжный октябрь» сылнымут фестиваль лиеш. Мероприятий кышкарыште 22 октябрь марте түрлө мастер-класс, модмаш, вашлиймаш да молат эртаралтыт. Книгагудын сайтыштыже эскерыза.

«Зарница 2.0» всероссийский сарзе-патриотизм модмаште Волжск олесе А.С.Пушкин лүмеш 9-ше номеран школын «Родина» сарзе-патриотизм клубын участникше-шамыч эн ойыртемалтше лу команде радамыш пуреныт. Икмыняр номинацийыште сенгышыш лектыныт.

Тау тыланд!

Туныктышо профессийым поро, тыматле кумылан, йочам йоратыше, чытыше ең-шамыч веле ойырат, шонем. Лач тыгай койыш-шоктышан класс вуйлатышем А.Н.Рассолова. Тудо биологий ден химий предметлам туныкта. Алевтина Николаевна ятыр тунемшылан чын корным ойыраш полша. Тудо кажнынам иксемын пагала. Класс дене түрлө конкурс ден мероприятийышке ушнена да чүчкыдын сенгыше радамыш лектына.

Тау тыланда, Алевтина Николаевна. Пайремда дене! Тек кече кеч куаным пөлекла, паша лектышда кумылым нөлта.



Юлия ЯГОДАРОВА.
Советский, Кельмаксола.
Фотом еш архив гыч налме.
Снимкыште: А.Н.Рассолова ден Юлия.

Пагалена да йоратена



Мый кокымшо классыште тунемам. Классыште коктын веле улына: мый да Радомир

Соловьёв. Туныктышына – Наталья Вениаминовна Семёнова. Снимкыште кумыньнам ужыда. Туныктышына пеш поро, шыма, мотор. Урок-влакым веселан да куштылгын эртар. Наталья Вениаминовна мемнам шотлаш, возаш, лудаш да шуко вес у сомыллан туныкта. Мом умылен огына шукто гын, уэш-пачаш рашемда. Классыште коктын тунемаш сай: чыла тўткыш лач мыланна. Мөнгысө пашам эре ыштыман: вашмутым кажне урокышто лач когылянна пуаш логалеш. Ме туныктышынам колыштына. Тудым йоратена, пагалена да пайрем дене саламлена.

Ярослава СЕМЁНОВА.
Морко, Арын.
Фотом еш архив гыч налме.

Поро кумылан

Тений Коркатово лицейште шымше классыште тунемаш тўналым. Ондакше Арын школышто шинчымашым погенам. Марий йылмым да литературым Н.В.Аркадьева туныкта. Нина Вениаминовна икымше урок гычак кумылем савырыш. Чылажымат тыматлын, ласкан да раш умылтира. Поро кумылан, йочам умылен

моштышо туныктышо. Пагалыме сным Туныктышын кечыж дене саламлем. Саламлымашке шымше классыште тунемше йолташем-влакат ушнат.

Лида ЯКОВЛЕВА.
Морко, Коркатово.



• Ушан ой •

Туныктышо шке предметше дене веле огыл, чыла шотыштат учитель лийшаш. Тиде лўмжак мом шога!..

Валентин КОСОРОТОВ.

Туныктышын пайремже

Акростих

Тунеммаште – вий-куат!
Урок гоч пален налат.
Ныжыл, поро мутшо
Ырыкта вет тўткын.
Көн нерген гын мут?
«Туныктышо!» –

йонгыш вашмут.

Ынде ме саламлена,
Шымше класс гыч улына.
Ынде мурым мурена,
Ныжыл мутым ойлена.

Пеледышым эн моторжым:
Астрам, розам – кондена.
Йонгыжо почеламутна,
Рўжге чаплын лудына.
Ешыште улылымашым,
Мотор илишым тыланена.
Жапше шуо: Туныктышо кечым
Ешыште, школышто пайремлена.
7-ше классыште тунемше-влак.
Волжский, Сотнур.

Эн шерге ең

Мемнан лицейште ятыр туныктышо пашам ышта. Кажныже шке профессийжым йората да мыланна келге шинчымашым пуа. Мый туныктышем-влакым пагалем. Но класс вуйлатыше Нина Альбертовна Александрова эн чот келша. Тудо йот йылмым туныкта. Уроклажым онгайын эртар, кумылым савыра. Ятыр пайдале пашам урокышто ыштен шуктена. Нина Альбертовнам Туныктышын кечыж дене шокшын саламлем!

Анна ИВАНОВА.
Морко, Коркатово.

Саламлем!

5 октябрыште Российыште Туныктышын кечыжым палемдена. Тиде пайрем ик эн ойыртемалтше. Мыйын шонымаште, кажне еңлан шергакан лийшаш. Мыят туныктышем-влакым пайремышт дене саламлем. Кажне кече куаным кондыжо, суапле паша лектышда тўвыргө лийже. Тыгай онгай, но тыгодымак неле пашам шуктен шогымыланда таум ойлем. Тек тазалыкда пенгыде, кумылда эре поро лийыт.

Кира ДАНИЛОВА.
Волжский, Пётъял.



Корно кушеч тўналеш?



Вес олала ден илемла деке мыняр кужыт ул-мым шотлаш тўналме верым «нулевой километр» маныт. Тудым шукуж годым рўдō почто отделений тураште верандат. Марий Элыште ты оралте Йошкар-Оласе Советский уремыште верланен. У арт-объект рўдолан географий да административный рўдер ул-мыжым ончыкта.

– «Нулевой километрым» ончыктышо пале олам сōрастарыше эше ик арт-объектыш да турист-влакым кумылан ден кертше верыш савырна манын ўшанем, – палемден Марий Эл Республикым Вуйлатыше Юрий Зайцев «нулевой километр» почмо годым.

Оля МОШКИНА.
Авторын фотожо.

Салам, Шупашкар!

Кеҗеж каныш годым авам дене пошкудо республикын рўдолашкыже, Чебоксарышке, миенна. Шупашкар – тошто, но моткоч мотор ола. Юл энҗер серыште верланен. Ола урем-влак кужу да лопка улыт.

Чебоксарыште ик шарныктыш – нылле куд метр кўкшытан «Ава-Аралтыш» монумент – чо-нешем логалын. Тудо кидшым кок могырышко шаралтен шога, тыге чуваш мландыште илыше тўрлō калыкым аралымыжым ончыкта.

Мыланем пошкудо олаште пеш келшен. Вес гана адак миен толаш кумылем уло.

Анастасия ПОЛИКАРПОВА.
Йошкар-Ола.



Патыр пушенге

Кужэнҗер районысо Тумья изи энҗер серыште кок уреман мотор Кугу Тумньымучаш ял верланен. Конганур школышто 6-шо классыште тунемше Ангелина Ершова шочмо кундемжым моткоч йōрата. Ёдырлан чылажат шерге: смышлан, понгылан поян чодыраже, пеледыш дене темше олыкшо, тамле вўдан памашыже. Но Ангелина эн йōратыме верлан ял воктенысе тошто тумым шотла. Тушко йолташыже-влак, Вова шольыж дене (снимкыште) чўчыкыдын канаш коштыт.

– Кеҗежым тумо, лопка ук-шыжым шаралтен, чевер

кечыйол деч ўмылыштыжō шылта. Шыжым нарынчалгыше, йошкаргыше лышташлаж дене куандара. Телым ече дене мунчалташ ике йырже калыкым пога. Шошым нарашта лышташнерже дене пўртўс ылыжмым шижтара. Мыланем ты пушенге моло деч ойыр-темалтышын, эн виан да эн моторын чучеш, – ойла Ангелина.

Йоча-влак, а те шочмо кундемыштыда эн мотор верлан мом шотледа? Шоналтыза да тудын нерген серышым возен колтыза.

Оля МАЙКОВА.
Фото-влакым еш архив гыч налме.



Усола гыч Элпанурын

Ме класс дене Усола ял гыч Элпанур марте кудалынна. Эн ондак мыланна Элпанур школ мучко экскурсийым эртаренит. Обелиским онченна, вара, чодыра гоч ошкылын, школ директор М.А.Богдановын аваж дек унала пуренна (снимкыште). Тудо верысе школышто пашам ыштымыж нерген онгайын каласкален.

Умбажыке корнына Марий Кошпай ялыш шуйнен. Тушеч татар Мерансолашке вашкенна. Кугу

Ачамланде сарыште лийше-влак-лан шогалтыме стелым онченна, верысе книгагудыш пуренна. Каналташат жапым муынна. Тулотым ылыжтенна, чайым, кчыкшым шолтенна. Да мōнгеш чодыра гоч, понгым поген-поген, шочмо ялыш толынна. Тыгай поход чоным кужу жап ырыкташ тўналеш.

Лиана ГОРДЕЕВА.
Параньга, Усола.
Фотом школ архив гыч налме.



Баскетбол – йӧратыме модыш

9-15 сентябрьште Санкт-Петербург олаште шнуй князь Александр Невскийын тӱнямбал спорт модмашыже эртаралтын. Тушко Белоруссий, Казахстан, Сербий, Индонезий, Египет, Гагаузий да Российын 75 регионжо гыч команде-влак ушненыт. Кужӧнгер районысо «Баскетбол» ушемн самырык спортсменкыже-шамыч Елизавета Лоскутова, Ксения Мочалова, Ариана Романова, Алина Рослякова (снимкыште) Марий

Элын командыштыже лийыныт да республикын чапшым араленыт. Ёдыр-влак Кужӧнгер посёлысо 2-шо номеран школышто тунемыт.

– Таӧасымаш спортын тӱрлӧ видше дене эртаралтын: футбол, ёстембал теннис, самбо, шахмат, баскетбол, тыгак ГТО нормативым шукташ кӱлын. Ме команде дене баскетболышто вий-куатнам ончыктенна. Чумыр иктешлымаш почеш 41-ше



Физкультура

верыш лектынна. Тидат тӱнал-тышлан сай результат. Кугу олаште лияш, йот кундемласе спортсмен-влакын опытыштым эскераш, нунын дене таӧасаш – моткоч кугу пиал. Тыгай йӧным мыланна тренер Виталий Леонидович Терёшин пуэн. Тудлан кугу таум ойлена, – палдарыш командын ик участникше, Ариана. Тудо спорт дене кылым кудымшо ий куча. Ёдыр 9-ше классыште тунемеш, садлан яра жапым тунеммашлан ойыра. Вет ончылыно – экзамен.

Оля МАЙКОВА.
Фотом вш архив гыч налме.

Спортзалыш вашкат

Чылан икгай формым чиен, Йошкар-Оласе 80-ше номеран «Ёжара» йочасадыш коштшо икшывс-влак (снимкыште) спортзалыш вашкат. Тушто нуным Ольга Викторовна Дождикова вашлиеш. Туныктышо ёдыр-рвезе-шамычын тазалыкыштым шуарымашке кугу надырым пышта. Йоча-влак дене мутланымек, тыгай поро ойым кольым.

Артём ШУБИН: «Мыланем йочасадыште пеш келша. Арнялан кок гана эртарыме физкультур занятийым чот вучем».

Ангелина КРАШЕНИННИКОВА: «Ольга Викторовнам пеш йӧратем. Кажне эрдене зарядкыш куанен вашкем».

Маша ПЕКШЕЕВА: «Мый гимнастикыш коштам. Физкультур занятийым моткоч йӧратем».

Арина НИКОЛАЕВА: «Спорт тазалыкым виянда. Туныктышына кумылым савырен мошта».

Варя ЦЕРБАКОВА: «Физкультурышто тӱрлӧ упражнениемым ыште-на, онгай модыш дене модына».

Надежда ГОДУНОВА мутланен.
Авторын фотожо.

Виян – сенгыше

Морко район Коркато-во лицейыште тунемше-влак «Движение Первых» толкынын эртарыме акциялашкыже рӱж ушнат. Ты ганат тыгак лийын. «Марафон Первых» акций радамыште лицейыште шыже кросс эртаралтын. Тушто 5-11-ше класслаште тунемше-влак вий-куатыштым тергеныт. Тыгай таӧасымаш икте-весе коклаште эн вияным, чыгышым, чолгам ойыраш полша. Кажне икшыве сенгышыш лекнеже. Теве 7-ше классыште тунемше Ярослав Яковлев (снимкыште) иктаӧашыже-шамыч коклаште икымше верым сенген налын. Тудлан медаль ден дипломым кучыктеныт. Ярослав лицейын чапшым районштат, республикыштат арала.

Вячеслав СМЕРНОВ.
Авторын фотожо.





Герда

Кум ий ончыч мыланна приют гыч пеш изи да явыге пинегым конден пуэныт. Ме тудым сайын онченна, мушкынна, тамлын пукшенна. Авам дене Герда манын лүмдаш мутланен келшенна. Ынде тудо мыйын кугу йолташем. Шукерте огыл Гердам дрессироватлаш тўналынам. Тудо мутем колыштеш, йодмемым шукта.

Зарина ФЕДОРОВА.
Волжский, Пётъял.

Ушан Алтай

Кодшо ийын мыланем изи пинегым конденыт. Ымбакеже ончалын, Алтай манын лүмдышым. Пинеге шем пуан, күрен шинчан. Моткоч мотор да ушан. Каласымемым умыла да ойлымем почеш иктаж-мом ыштенат кертеш. Кеч-кушко каена гынат, ныл йолан йолташнам эре пеленна налына (снимкыште). Алтай торашке ок кай. Тек кажнын тыгай пийже лиш!

Ксения ЕГОРОВА.
Морка, Коркатово.
Фотом еш архив гыч налме.



Ола-вула

Ола-вула пырысем
Пордеш мыйын воктенем.
Лузга почшым рўзалта,
Модаш пешак йората.

Денис МЕДВЕДЕВ.
Волжский, Пётъял.

Пийлан модыш

Пийым арам огыл ик эн ушан янлыклан шотлат. Шымлызе-влакын ойышт почеш, тудын уш-акылже кок ияш йочан дене икгайрак манаш лиш. Пий айдемын койышыжым умылен мошта, кўштымым шуктен кертеш. Тидлан тудын вуйдорыкшо ден капкылжым виандыман. Тыгодым тўрлө модышым кучылтман. Могайым? Капкылым виандаш тўрлө мече, фрисби, онго-влак келшат. Модыш пентгыде материал гыч лийшаш.

Пий пураш йората. Тыге пўйжө эрыкталтеш да сырымыжат лушка. Тидлан резине да коваште гыч ыштыме модыш-влак келшат. Уш-акылым виандыше модышым эртарыме годым пийлан тамле сийым пуыман.

Модышым ойырым годым пийын ийготшым шотыш нал-



ман: пинегылан пушкыдым, а кугыраклан пентгыдыракым пуыман. Шаланыше да лавыран модышым темлыман огыл. Ныл йолан йолташ дене жапым шуырак эртарымеке, икте-весе коклаште вашкыл пентгыдемеш.

Катя СЕРГЕЕВА ямдылен.
Фотом freepik.com сайт гыч налме.

Йыргешке кинде гай



Кажне гаяк йочан йоратыме ныл йолан йолташыже уло. Мыйын гын – Плюшка пырысигем. Молан тыгай лўмым пуэ-

нам? Тудо чылт йыргешке киндыла коеш. Плюшка кок тўсан: сур да ошо. Шинчаже ужарге-ужарге, чылт нўргө шаршудо гай. Уремышке лектешат, лывым поктылеш. Тўрштылаш, эре ала-кушко кўзаш тўча. Эше ўдырьен семын шкенжым воштончыш ончылно эскераш йората. Модаш тўналеш гын, пўрт мучко имньыла кудалыштеш. Иктаж-кушко каяш лектам – капка марте ужата. Йоча-влак, ныл йолан йолташдам йоратыза. Нунат чонан улыт да мемнам куандарен мошлат.

Юлия ЯГОДАРОВА.
Советский, Кельмаксала.

• Палаш онгай •

Янлыкым аралыман

4 октябрь – янлык-влакым аралыме тўнямбал кече. Росийыште ты кечым 2000 ий гыч палемдат. Тўнямбалсе 70 утла эл тўрлө мероприятийым эртарат. Шуэн вашлиялтше янлык-влакым аралаш кўлмө нерген ушештарат.

✓ Тўнямбалне кажне кечын кум тўрлө янлык пыта.

✓ 34 тўжем тўрлө кушкыл ден янлык йўршеш йомын кертыт.

✓ Тўнямбалне эн кугу янлык-лан канде кит шотлалтеш.

Йоча-влак, теат поро кумылым ончыктымо пашам ыштен кертыда. Приютышто илыше янлык-шамычлан кочкышым погыза. Волонтер семынат тушто полшаш лиш.

Модмо верыште ару

Кундемыштына – шыже. Пушенгыла гыч лышташ-влак лыве гай койын йогат. Мландымбаке шыман возыт. Шыже субботникым эртарыде, арулыкым ышташ ок лий. Кугыен-влакым ужын, йоча-шамычат ушнат.

Теве Йошкар-Оласе 61-ше номеран йочасадын «Дюймовочка» группыкыжо коштшо ўдыр-рвезе-шамыч (снимкыште) шке участке кумдыкыштышт лышташым тыманмеш удырен налыныт. Модмо верыштышт арулыкым эскерат. Яндар южышто пашам ыштымаш тазалыклан веле огыл пайдале, тыгак йоча-влак коклаште келшымышым виянда.



Надежда ГОДУНОВА.
Фотом йочасадын архивше гыч налме.

Шыже түс

Чыла вере шыже озалана. Вондерлан, пушенгылан, шудылан вес сывыным чиктен. Южыжо шапалгыше түсан, шукужо чевер-мотор шортньо чиeman. Кызыт ваштар эн сылне вургеман. Чевер-нарынчалге түсшö торашке волгалтеш. Мардеж пуалме дене пушенгыла гыч лышташ-влак вельт. Но але «лышташ йўрын» жапше шуын огыл. Игече эркын йўкшемдаш тўналын. Кажне пагытын – шке жапше.

Надежда СТЕПАНОВА.
Морко, Коркатова.




Тимофей СМЕРНОВЫЙ сўретше.
Медведево, Рузм.

Писе ур

Палаш онай

- 1 Ур 4-6 метр кужытыш төрштен кертеш. Тыгодым вужга почшым руль да парашют семен кучылтеш.
- 2 Ныл ончыл пўйжö ўмыржö мучко кушкеш. Садлан ур эре мом-гынат пуреш.
- 3 Шукуж годым ур шкет ила. Чот йўштö годым икмынярын, икте-весым ырыктен, ик пыжашыште телым эртарат.
- 4 Ур коваштыжым чот эрыкта.
- 5 Янлык почшо дене леведалтеш, шокшо игече годым тудын йымалан авыралтеш. Лўдыкшö

Урым сўретлена.



улмо годым поч дене икте-весеыштылан уверым пуат.

Йолташем

Мыйын йолташем – Лиза. Ме Коркатово лицейыште туныма: йолташ ўдырем нылымше класшыште, а мый визымшыште. Мемнам каже кечын школ автобус шупшыкта. Иленаже ик ялыште, Ердўрыштö. Ялна чодыра лонгаште верланен. Шочмо верна понгылан, смышж-саскалан поян.

Лиза мыйын семынак сўретлаш йöрата. Яра жапым пырля эртарена. Шукерте огыл коктын чодыраште тўрлö түсан лышташым, кож пўгыльмым погышна. Шыже поделкым ышташ шонена.

Ульяна МИТРОФАНОВА.
Морко район.



0+

Марий Эл Республикасы
«Марий Эл»
увер агентстве» КАУ.
Директор –
Е.И.КУЗНЕЦОВ.
Тўн редактор –
А.Н.ГРИГОРЬЕВА.

Индекс П4696.
Тираж 1550 экз.
Заказ
Формат – А-4-8.

Учредитель-влак:
Марий Эл Республикасы Тўвыра,
печатъ да калык-влакын пашашт
шотышто министерстве,
Марий Эл Республикасы
«Марий Эл» увер агентстве» КАУ.

Редакций да издатель: Марий Эл
Республикысе «Марий Эл»
увер агентстве» КАУ,
424006, Йошкар-Ола,
СССР Вооружённый Вийын 70-ше
идалькше урем, 20-шо порт.
Тел. 8(8362) 45-22-82.

Газетым редакцийыште
погымо да верстатлыме,
«Марий Эл Республикасы
Правительствын
типографийже» ООО-што
ямде оригинал-макет гыч
савыктыме.
Типографийын адресше:
424000, Йошкар-Ола,
Комсомольский урем, 112.

Печатъш пумы жап –
14-00, фактически – 13-00.

Авторын да редакцийын
шонымашышт тўрлö лийын кертят.
Серыш-влак мөнгеш огыт колталт.
Ак – кутырен келшыме почеш.

https://vk.com/yamde_lii
<https://t.me/yamdelii>
yamde_lii@mail.ru
yamdelii@mediamari.ru
(автор-влаклан)
Сайтын адресше: ямделий.рф

Газетым Кыл, информационный
технологий да массовый
коммуникаций сферым
эскерыме шотышто
федеральный службын Юл кун-
дем федеральный округысо
управленийыштыже
регистраватыме.
Номер – ПИ № ТУ52-01404,
2023 ий 22 сентябрьыште пумы.

Конкурсым иктешлена



Көн пакчаштыже эн сылне пеледыш?

Тидым таче пален налына. Черетан фотоконкурсна мучашке лишемын. Ёдыр-везе-влак ты гана чолган ушненыт. Кажныже пакчаште кушшо эн сылне пеледышж дене палдараш вашкен, мотор фотом ыштен. Чылалан тау. Но конкурсын условийже почеш, эн шуко лайкым погышо сенышыш лектеш. Тидлан тёрлө йоным кучылташ лийын. Йошкар-Ола гыч Софья Чулкова (снимкыште) чапле фотом войзен, пеленже заметкым серен, газетлан подпискым ыштен. Ты шотышто ача-авалан таум ойлыман. Тыге эн шуко лайкым поген, фотоконкурсышто сенышыш лектын. Софьям саламлена! Тудым редакцийыште пөлек вуча.

Сүретым чиялтыза



3 октябрьыште руш поэт Сергей Есенинын шочмыжлан — 130 ий.



● Сергей Есенин 1895 ийыште Рязань губернийысе Константиново селаш шочын.

● 8 ияшак возаш тўналын.

● 1914 ийыште «Берёза» икымше почеламутшо «Мирок» йоча журналеш савыкталтын.

● «Радуница» икымше книгаже 1916 ийыште лектын.

● Коваже Сергейлан йомак-влакым каласкален.

● Сергей Александрович Есенин 500 утла почеламутым, 8 прозым возен.

Вячеслав СМЕРНОВ ямдылен.

Тушто-влак

✓ Вудыштө ила, йылым йората.

✓ Коргыжө — йошкарге, а ўмбалже — ужарге.


✓ Йолжо — сур, упшыжо — шун.

Александр ИШКАТОВ.
Татарстан, Агрыз, Кадрек.

Транспорт-влаклан келшыше ўмылым муза



Шотлыза



Лыве ден копшанге-влаклан пеледыш марте миен шуаш полшыза

